



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 7

Yangia anidakangma : Tir Yimym

tiryimym@aolima

tir yimym

TAPAK 8

Israel PM Netanyahu mozü kidang lir,  
pacemaker inoktsü

Sumit Nagal-i Tampere  
Open kokogo



VOL. XX NO. 281 (ADOK 281) DIMAPUR TENTONÜ (MONDAY) CHITENI (JULY) 24, 2023 ₹ 5.00

## Chümoukedima nung Manipur asoshi sarasademtsüba sentong agi

**Chümoukedima, Chiteni/July 23 (TYO):** Forum for Naga Reconciliation (FNR) ajanga Nagaland Joint Christian Forum, Fellowship of Naga Baptist Churches aser Chümoukedima Town Pastor's Fellowship den lungjemer Deobarnü Chümoukedima nung 'FNR Solidarity and Prayer Watch for Manipur' sentong ayongzüka liasü.

Iba sentong nung jembidang, tia makai iba ama atalokdaksütsü Delhi-i telemetba agira, Manipur nung kechi ataloktar, kasaji Nagaland aser Northeast region nunga mela-mela ataloktsü, ta social activist Niketu Iralu-i ashi.

"Iba ama mapang ka nung asenoki kanga junga asadangtsü merangtsüla. Saka Manipur asoshi asenoki kechisa jembidir jembiaaka, aseni angatetbaji shidak ta tatem kuma mebilemstüla," ta pai ashi.

Nüburtem dang aibelen masütsü ayongzüka mapang, temenen mapa tamajung inyaker dak aliba tashi mait ya asen daka kasa lir, ta pai ashi.

Tetsübo, arendaka bilemba,

temolung melemtetba, mangmangba aser jashiba asenok ajaki meteter, saka junga masadang seniuka yutsüba ajanga Manipur nung azüdokshi adoka lir.

Asenoki lenirtem ta tenüing tetshirtemi kisting masü saka ajaki khuret mabenba ajanga Nagaland nunga kasaji maziükteti lendong timtem ajurutsü, ta pai ashi.

"Tang mapang asenoki kechi jembidir jembiaaka, asenoki teti asoshi tangatetep kati arutsü atema dang jembir, aser asenoki mashi leni angatetsü akok. Saka Northeast nung nüburtem rongnung jungtepa aser tamang katepa alitsü kanga tongtipang lir aser aji ajaki angatetsüla. Ibai tarutsü nung asangsang asütsü, saka aji ajurutsü," ta pai ashi.

Asenoki meima, aria bilemba ajanga tanü asenok andenshia lir, ta FNR Convenor, Dr Wati Aieria iba sentong nung ashi.

Nisung ajaki taneptsü aginer, tesempatep, azüdokshi aser tasüba ya tatem masü ta ajaki angateta amanger aser imlar, ta pai ashi.

## ULFA-i Assam DGP GP Singh amokmeren

**Guwahati, Chiteni/July 23 (Agencies):** Mangatetep adoktsüsa temolung melemi alirtem tepsetba/yirutsüba mapa manenra timtem tulu alitsü, ta telungpur telok, United Liberation Front of Asom (ULFA) ajanga July 23, 2023 nü Assam Director General of Police (DGP) GP Singh amokmerena liasü.

Upper Assam nung shishilempar dang nungi tashiyim amshia senotsü meshi ta tai tonglokja alir ka police temi injang agi yirutsüba sülen iba osang ya sangdonga liasü.

Ajisüaka nokdanga aliba telungpur telok yagi ashiba agi, aiben ULFA tenüing nung nisung kari sen bendener.

"Samyukta Mukti Bahini, Assam (Swatantra) organization tenüing nung Tinsukia nung Pushpanjali Gogoi-i sen saruba mechi Dibrugarh police temi tanü la den sen lakh asem apuba osang angazükogo. Iba tetsüla ya onok den tesendaktep kecha

mali ta onoki Assam nung aliba nüburtem aser Assam Police dang metetdaksüogo. Anungji Samyukta Mukti Bahini, Assam (Swatantra) den sendaktepja nüburtem nem temerenshi agütsüba anenang," ta iba telok yagi sangdong ka nung ashi.

ULFA-isa ashiba agi, Sivasagar district nungi Hem Chetia ta sür tebur ka police temi kasa kuli nung apu aser tetsüing nung prangbong agi akha.

"Iba nisungba ya sen bendentsü atema Samyukta Mukti Bahini, Assam (Swatantra) teloki meshim. Samyukta Mukti Bahini, Assam (Swatantra) tenüing amer pa ya tashiyim agi amshia alitsü akok," ta ULFA-i ashi.

"DGP Gyanendra Prasad (GP) Singh-i 'fake encounters' inyaka aiben pa tasü aitiba sayua arur. Iba amala maparen tekeraba nung anentsüla. Ibai onoki tekum dangtsü agütsüba tatem asütsü," ta sangdong ajanga ashi.

## Manipur azüdokshi atema CNSA-i khuret abener

**Dimapur, Chiteni/July 23 (TYO):** Manipur nung ita ana tashi azüdokshia nisung takum laluba, ki o jen raksaba aser nisung meyerijang aiba tesem balala nung prokshia alitsüsa akumba atema süöki ia bilemstür, ta Central Nagaland Students' Association (CNSA) sangdong ka ajanga ashi.

Iba yongji nisung aika Nagaland nung jenoka lir. Tensa majungba ajanga nüburtem pei kidang meliteti tesem balala nung jenokba angateter, ajisüaka parnok aikati talisa Chümoukedima district kübok Medzhiphema nung nung

parnok indang Aadhaar nung address melenshitsu merangba angazüker. Iba ya mapang shidak nung mepettep tarutsü nung timtem tulu alitsü, ta CNSA tir R. Sunep Pongen aser tongti zülur Anoka H. Zhimo nati sangdong ajanga ashi.

Sorkari menonui mera agiba atema CNSA-i tenüingsang agütsür aser ketdangtsür dang kanga junga repringshima mapa kuma inyaksü ajungshir, ta sangdong ajanga ashi.

Manipur nüburtem timtem nung aliba atema aria bilemstür aser yimjung tesunep akhanger, ta CNSA sangdong ajangasa ashi.

## Manipur nung India sorkari tamakok ajuru: WC, NNPGs

**Dimapur, Chiteni/July 23 (TYO):** Government of India ya temolung teladak, tamangba yimsü temeja ka kising masü aser vibrant democracy ta züngshia aruba joko kodanga kasa masütsü.

Manipur tiyong sür anokshitsüba ya US, EU parliament aser alima tesem ajungalen nungi meteter. Tang Manipur nung nisung aika tepsetba, ki o jen raksaba aser asüba ama India nung nüchiso ngur kodanga majangshidang. Mother India ta ajaba temang aser tanüla lar tanuri tamakitsü kumtsür, mangsa, menener aser akumtsübo mesü amshiba angur, ta Working Committee, Naga National Political Groups (WC, NNPGs) sangdong ka ajanga ashi.

Manipur nung India indang democracy wazüka ayutsüpuri meinyaktet, party politics aser kin telemsa indang temenen dang par tanüla yoka chiogo. Iba yagi India kidanger aser alima ajunga maksütsüogo. Democratic India nung anogoshia tai maket azü tokshir. Government of India-i ola madoki kanga asükuma jembiba democracy mangsa kum daksüogo, India indang 'secular crown' nungi senti long ajak agizükogo. Alimai tanü Manipur nung, democratic India nung anguba ama mangatetep aliba Middle East, Afghanistan mesüra tang Russia-Ukraine rara

nunga mongudang, ta WC, NNPGs sangdong ajanga ashi.

Meitei nungeri ST jenjang meshiba anema tribal kin temi May 3, 2023 nü ola madoki yimjung nung longkak aitiba ajanga Manipur ketdangtsür temi pei atepzüing senzüka yutsü aser Meitei kin nem state forces temi yarisema state indang nok-nü aser hadir ayudak nungi automatic aser semi-automatic prangbong meyerijang aika aser injang jenti agizükdaksü. Manipur nung mapa tamajung inyakba nung kin aser tamangba yimsü tsütsü tejak shir inyakba tejangja lir. Ibai jelia renema aliba maparen lir. Manipur state sorkar aser Gol lenirtemi tai maket ama mejembitsüla, ta sangdong ajanga ashi.

Meitei nungeri tekülem ki noklang ana dak tema raksatsüba aser rongdoktsüba ya kati ka den angatetepa aliba masü mesüra secular-a masü.

Imphal valley nung Meitei Christian Churches rongdoktsüba nung tasa kechi aliar Meitei kin temi rateta ashitsüla. Khristan Meitei nunger tema ganja lu yima 'Narco terrorism' mapa inyaker asü? Biren Singh-i jembiba ama Kuki nunger ya Narco terrorists asünungbo, Meitei Khristanpur ya kechi aser kechiba parnok indang tekülem ki rongdoktsü? Iba tasüngdangba ya Meitei nungeri langzüksüla. Tamangba

yimsü nung ajemdaker iba ama lendong tulu aketba mapa inyakba nung Naga nunger ola madoki malitsü. Ibai ST jenjang, UCC kising akhangba indang masü. Ibai tamangba yimsü nung ajemdaker kin samatsütsü merangba maparen lir. Ya khenyongi magizüketeter, ta WC, NNPGs ajanga ashi.

Telungpur tebilemstü anema longkak aita Meitei tsür temi Indian Army dang parnok mangsa sayuba tenüing ajangzüka lir. Tetsür aser jala tem mangsa senzütsü melaba sobaliba aser yimsü lira, kasaji danga kin nem tashiyim agi mamshidaksütsüla. Kija mesüra teloka süang. Longkak aيتدanga süang maitdanga süang, mangsa senzütsü ya kin ajak asoshi magizüketeter mapa ka lir. Ibai 'human decency' anema lir. Nisung shingia pa tekolok shidak lia, civil-a süang mesüra military-a süang, yimtung nung tetsür mangsa aliba ajurutsü tejak angema atutsü temolung mulutetsü, ta ashi.

Meitei nunger tebur temi danga kin nungi tetsürtem tashiyim agi mangsa yimtung nung anir senzüa parnok dak tim masüba mapa inyakba ya meimchir memesük aser tatok magütsütetba mapa ka ama ajiteter, ta WC, NNPGs ajanga ashi.

(Maneni tapak 2 nung...)

## Manipur: May 4 nü ano tetsür ana tashiyim amshia tepset



medem aser reshikangshia amshir tepset.

Manipur kübok Thoubal district nung nisung telok kati Kuki tsür ana süoshi semzüksür mangsa anir senzüba indang video ya social media sapangtem nung July 19 nü temai adok aser iba tatalokba dak sendakba nung FIR ka Saikul police station nung May 18 nü benoka liasü.

Osang ajanga ashiba agi, nisung telok kati pua bener oa tashiyim amshia shi nung medemer tepseba tetsür ana ya ka arishi küm 21 aser ka arishi küm 24 liasü aser tena ya Imphal nung gari shidokba Gama Car Wash nung inyaka liasü.

Nütsüing timba aliba Meitei kin nem scheduled tribe jenjang agütsütsü benokba anema Kuki nungeri nokdaka Churachandpur nung raratep tenzüker anogo ka sülen May 4 nung iba ya atalok ta ashir.

Iba ken o nung Manipur police-i tang tashi nisung kata pua mali.

Tetsür ana asoshi temeden bushia aser obendang shidak agüjang ta takhangba agüja Kuki Zo Unity Forum ajanga online campaign ka tenzükögo.

**Guwahati, Chiteni/July 23 (Agencies):** Tetsür ana tashiyim amshia mangsa yimtung nung anir senzüba video alima asüngba atalokba anogo nung ano Manipur indang Kangpokpi district nunga Kuki Zomi tsür ana nisung telok kati tashiyim amshia shi nung medemer tepset.

Osang ajanga ashiba agi, iba tatalokba dak sendakba nung FIR ka Kangpokpi district kübok Saikul police station nung benoka liasü.

Ajisüaka Manipur police temi FIR ya May 16 nü-ang register asü, koba Manipur tsür ana tashiyim amshia mangsa yimtung

nung anir senzüba dak sendakba nung police temi ashishitep ken o benoktsü anogo ana lia ang inyak.

FIR ya tetsür ana indang tetsüi ashishiba nung ajemdaker nisung tepsetba, tashiyim agi shi nung medemba aser pua bener aoba indang section tem kübok zülüoka liasü.

Indian Express osang ka ajanga ashiba agi, ashishitep ken o benokba nung tetsüi ashiba agi tetsür ama ya Imphal East nung gari shidokba tesem ka nung inyaka liasü aser parnok aliba 'para' kidang May 5 nü mejangjaba nisung 100-200 shi arua tashiyim amshia shi nung

# NCSU Tuensang District inti senden menogo



**Dimapur, Chiteni/July 23 (TYO):** Nagaland Contractor and Suppliers Union (NCSU), Tuensang District inti senden den repsema picnic sentong July 22 nü Eshou Check Post APMC Tuensang nung agiogo. Iba senden ya Gen. Secy. NCSU Tuensang Dist Yangdibi Sangram lenisüba nung mena liasü. Senden ya N. T. Mongko

Vice President (NCSU) Tuensang District-i sarasademer tenzük aser tir H. Muzung Yim-i lokti pela agizüba o jembia liasü. Senden nungsa NCSU Head office Kohima vice president Manyasipong A. Chang, Secretary NCSU Head office N. Tali Sangtam aser Executive Member (NCSU) Tuensang

Dist L. Among Yim nungeria o tatsütsü jembia liasü. Sensaksem mapang züngsem ajaki mulungtepa Advisors pongu shimtsü aser senyur ama I. Alemba Chang shima liasü. Maneni Shea Khamniungan, Executive Member, Tuensang-i tatem sarasademba sülen chiyongba mapang liasü.

# Axom Nagarik Samaj-i Manipur CM mapa nungi anentsü akhang

**Guwahati, Chiteni/July 23 (Agencies):** Manipur nung ita asemshi tanen makai mangatetp adoka aruba mapang ka nung Assam nung Axom Nagarik Samaj-i kanga süoki ia bilemba aser temulung zürepeba lemsatepogo. Iba lokti tentet yagi Manipur Chief Minister, N Biren Singh mapang nungi anentsü atema ayongzükogo, kechiyong pai azütokshi lendong atalokba maziüktet aser yimjung bener arutsü atema jenjang tapet magitet. Manipur nung tensa kanga mejungi lir aser tang tashi nung nisung 100 dak tema süogo aser nisung 50,000 dak tema pei talidak ki toktsür jenshiaogo. Kasa mapang nung Kuki nunger anema state police-i inyaksangshiba osang dena

temai adokdar aser iba ajanga tensa tamajungba kümdaktsür. Axom Nagarik Samaj-i, BJP sorkari yimjung asoshi jenjang tapet magitetba aser tesempatep prokshiba atema aitsüogo. Parnokisa, nisung taküm aika sama azütokshi lendong tulu ataloker aliba mapang Chief Minister-i pa mapa maneni abentsü metemsüi kümogo, ta ashi. Tensa azüoktsü atema Centre sorkari takaratiba nung jenjang magiba atema lenla balala nungi taitsüba ajangshidar. State nung President's rule benoktsü aser Chief Minister mapa nungi agintsü atema ayongzükaba mangaba ajanga tai maketba nisung taküm aika samaogo. Kasa mapang nung anogo

ishika tejakdang tetsür ana mangsa yimtung süa anir senzüba video ka ayimsünga prokshiba sülen ano tensa tamajungba kümogo. Ato Kilonser-i menor telangzüba agütsüba aser tensa junga maziüokba atema pa-a aitsüogo. Axom Nagarik Samaj-isa, iba amala tatalokba ajanga BJP-i aniba sorkari Northeast tesem asoshi kecha süoki ia mebilemba sayur, ta ashi. Maneni parnoki Supreme Court-i tuyuba ama Manipur nung mepetmesü tenzükba tera jangjatsü atema judicial inquiry ka agitsü asoshi ayongzükogo. ANS-i ashiba agi, sen aser tesempatep agi yimden yimsüsüba nung teyari agütsütsü ako ajisüaka lokti nung temzüng ozüing azüoktsü makoktsü.

# Arunachal nung Manipur atema azü tenlaba camp akatsü

**Itanagar, Chiteni/July 23 (Agencies):** Manipur Welfare Society of Arunachal Pradesh (MWSAP) aser Arunachal Life Saving Foundation (ALSF) nati Honibarnü sangdong ka ajanga Manipur nung nüburtem atema anogo asem azü tenlaba camp ka ayongzükaga agitsü sentong aliba sangdongogo. Azü tenlaba camp ya August 8 nungi 10 tashi state health department aser Ramakrishna Mission Hospital (RKMH) den

longjemer ayongzükaga agitsü, ta Arunachal Life Saving Foundation mendenbuba Ramesh Jeke-i ashi. "Rara mapang mesüra azütokshi lendong balala atalokba mapang azü nungdaker, anungji tenüngdakba peritsütsü atema lokti tentet ana yagi Manipur nung nungdaka aliba nüburtem atema azü tenlaba camp ka ayongzükaga agitsü telemtetba agiogo," ta pai ashi. Iba azü tenlaba camp

ayongzükaga agiba nükjidongji Manipur nung mepetmesü adokba mapang yirur alirtem temang anepaluba nung teyari agütsütsü asoshi lir ta Jeke-i ashi. Paise, camp nung bendenba azü ya Manipur-i belener aotsü aser iba atema lokti tentet ana yagi Angh aser state sorkar dang mela mela aser takaratiba nung Manipur-i azü bener aotsü atema lenmang lapoktsütsü mepeshia astüngdangogo.



July 22 nü Kigwema, Nagaland anasa National Highway 2 nung ozüing alema kozü tone 20 shi shibelener oya aliba Assam Rifles-i nokdangogo. AR-i apuba kozü ya sen crore 2.4 shi alang liasü. Kozü ya Manipur nungi Nagaland-i bener adoka aliba mapang apu. Parnoki apuba kozü ya Customs Department, Kohima nem bendanga agütsüogo.

# Meghalaya: AYMBBS-i Garo Hills MLA tem aitsü

**Tura, Chiteni/July 23 (Agencies):** Tura ya Meghalaya indang 'Winter Capital' ta sangdongdaksütsü atema ACHIK-i anir NGO temi lumia longkak aitba dak sendakba nung Garo Hills nungi MLA 23-i kecha ola madokba ajanga kanga aoksaba Achik Youth Movement for Better Society (AYMBS)-i sangdong ka ajanga lemsatepogo. Ajisüaka Gambegre MLA Saleng Sangma-ibo ACHIK-i akhangba pusema jembio. ACHIK aser tanga NGO züngsemtemi backlog appointment tem merektetsütsü aser Tura nung Winter Capital amenoktsü khanga Tura jila nung lumia longkak aita arudar. "Saleng Sangma dak alaka Garo Hills nungi MLA 23-i ola madokba ngua onok kanga süngmanger aser mepelar. Lumia longkak aitba ya joko hopta anashi aoer, saka MLA temi ola madoker," ta AYMBBS

tir Peterjob A Sangma-i ashi. Peter-isa, MLA tem dang parnoki election mapangbo lokti ajungkettsü atema ola atoktsü ta tenangzükba agütsüogo, saka tang ola madokba ya agizüktsü makok, ta ashi. "State ngutetertemi mulungtepeba ama Garo Hills nung state indang tanabuba capital amenoktsü langa lir. Iba ya mulungtepogo, ajisüaka tang tashi nung benoka mali. 1970 küm mezüngbuba cabinet senden Tura nung mena liasü," ta pai ashi. "Onoki nenok nem vote agütsü aser onok takhangba süoki ia agitsü imlar. Onoki temzüng ozüing alema kecha makhanger. Tanabuba capital amenoktsü atema CM aser Angh-i tongtubang shilem agitsü. Garo Hills nungi MLA 23-i Saleng dang angazükba iba takangba ataloktsü atema tejakdangi arutsüla, koba tang tashi mataloki lir," ta Peter-i ashi.

# Mkg-ZBTO transmission line raksaba Executive Engineer-i metetdaksü



**Dimapur, Chiteni/July 23 (TYO):** Mokokchung Transmission Division Executive Engineer, Er Hekaito Assumi-i sangdong ka ajanga, taoba hopta ishika tziunglu medangi aruba ajanga anentsüh alua Lizu yimtsüng anasa Location No. 133 nung Transmission Tower kanga mejungi raksaba Zunheboto District kübok consumer ajak aser nüburtem nem metetdaksüogo. Iba dak sendakba nung

department ketdangsürtemi transmission tower raksar aliba tesemi tsüngtong oa asadangogo aser tower tamajungba raksa maotsü atema jenjang agiogo, ta paisa metetdaksü. Maneni department-i, nüburtem dang transmission tower yanglushiba mapang tetsükdaktsü adokbatem aremzükba atatsü aser takok tashi teka amteper inyaksangshitsü atema mepeshia metetdaksüogo.

# Manipur nung India sorkari... (TAPAK 1 NUNGI...)

Ibai meimchir anema mapa tamajung inyakba lir. Parnok kinungtsür, adianutsür, jala tema kasa yimya nung amshinung Meitei nunger ajem-ajema alitsü asü? Alima sünga video prokshitsüsa atalokba anogo, May 4, 2023 ya Meitei nunger tangatetba shisatsü asba anogo ka ama züingshitsu. Meitei nungeri par asoshi tatem maka maksü bener aruogo, ta ashi. Akhi mapang nungi tetsür anema tim masüba mapa inyakba ya sorkari yaria inyakba ethno-religious terrorism shilem ka ama züingshir. Tazüokba makai ita asem jungnüa azüdokshia aruka Biren Singh sorkar tang tashi nokdaka lir. Maksü kota tuli! India nung yimtenren tsütsü lenirtemi pei nükjidong tongogo. Region nung tarutsü tia asadangra, kanga tetsübotsüka lir. North East India indang loktiliba, rongsenketzüng, tamangba yimsü aser sobaliba, yimtenren aser puti otsü akhi mapang nungi kanga teraksatsü kanga temela. Centre nung India nunger lenirtemi

telungjem asoshi jembia inyaktsü melena 'communal card' asaya electoral points angutsü teimla nung repranga atatsü atongteta Imphal aser anasa aliba yimti-yimtung nung tai maket nisung zü ayimer. Nisung tepsetba tanü tashi mejangjateter. GoI-i Manipur nung pei sasa pei süki nung mi senogo. Mi ya prokshia aotsü. Parnoki nüburtem ano maneni mekumzükttet. Naga, Meitei aser Kuki nungertem küm meyerijang aika külemi kati ka den amteper lia aruba khenyongi melenshiogo. Election ya arutsü aser aotsü, sorkar-a arutsü aser aotsü, Prime Ministers aser Home Ministers tema arutsü aser aotsü, saka asen nüburtem aser kin tem maneni putu sa putu külemi alitsü. Manipur mepetmesü ya GoI indang tasa nung tamakok ajuruba lir, koba ajanga India indang North-East tamendak dak tashi mait kumdaktsüogo, ta WC, NNPGs ajangasa ashi.

### July 26 nü Ato kilonser Modi-i ITPO complex semzüksütsü



New Delhi, July 23, 2023: New Delhi nung tawa yanglushiba ITPO complex noksa nung angur. Taküm September ita nung iba complex nung G20 lenirtem senden amentsü. July 26 nü Ato kilonser, Narendra Modi-i iba complex semzüksütsü.

#### New Delhi, July 23

(Agencies): July 26 nü Ato kilonser, Narendra Modi-i tawa yanglushiba ITPO complex semzüksütsü; taküm September ita nung iba complex nung G20 lenirtem senden amentsü, ta Amongnü ketdangsertemi metetdaksü.

Iba complex dang Pragati Maidan complex taka ajar. Iba campus area ji acre 123 lir aser India nung MICE (Meetings, Incentives, Conferences & Exhibitions) tulutibaji ibai lir.

Sentong tulu agitsü atema alima nung exhibition aser Convention complex tulutiba 10 rongnung tawa yanglushiba IECC complex densema lir. Top 10 complex rongnung Germany nungi aliba Hannover Exhibition Centre aser Shanghai (China) nung aliba National Exhibition & Convention Centre (NECC) densema lir.

Convention Centre Level 3 nung nisung 7,000 tashi mentettsü aser ibaji Australia nung aliba Sydney Opera House

dang nungia tulutiba lir, kechiyong Sydney Opera House nungji nisung 5,500 tashi dang menteter.

IECC nung aliba exhibition halls tenet nung oset balala sayatsü atema tesem tulu lir aser nisung 3,000 mentettsü amphitheatre ka lir.

IECC campus nung gari 5,500 dak tema anena yutettsü aser iba complex semdangertemi gari senzüsempogba tsütsü timtem kecha majurutsü.

### Amit Shah-i Gujarat aser Delhi nung tzümetzung tensa asadang

#### New Delhi, July 23

(Agencies): Amongnü Union Home Minister, Amit Shah-i phone ajanga Gujarat Chief Minister, Bhupendra Patel den state tesem balala nung tzümetzung tensa osang metetpela den külemi Delhi Lieutenant Governor, V K Saxena dangia phone süa Yamuna ayong nung tzü metsümba osang metetpela.

Tesülen Shah-i twitter ajanga, "Gujarat CM Shri

@Bhupendrabjp den state nung tzümba sashia aruba sülen tesem balala nung tzümetzung tensa aliba osang metetpela. Delhi LG, VK Saxena den-a Yamuna ayong nung tzü level atuba atema jembio. Teyari nungdabapurtem atema SDRF aser NDRF teams peria lir," ta metetdaksü.

Honibarnüa southern Gujarat aser Saurashtra region kübok aliba district aika nung tzümba sashia aruba ajanga

yimti aser yimtsung aika nung tzü metsümba aser tzü nokdang (dam) aika den ayong aika nung tzümetzung ayimer.

Amongnü Delhi nunga Yamuna ayong nung tzü level kanga tua liasü. Uttarakhand aser Himachal Pradesh tesem aika nung tzümba arua Hathnikund barrage nung yimokba sülen iba barrage nungi tzü chiokba ajanga Yamuna ayong nung tzü metsümba ayimer.

### India nung sensaktiba MLA, Dhara ket nung gari mesüra ki mali

#### New Delhi, July 23

(Agencies): Tawa Association for Democratic Reforms (ADR) aser National Election Watch (NEW)-i India kübok state assemblies aser Union Territories ajak nung MLA tem indang election affidavits asadanga liasü.

Election jakdang candidate temi affidavits nung pei nija osang balala agütsür. ADR aser NEW nati India nung state assemblies 28 aser Union Territories ana nung MLA 4,033 nungi MLA 4,001 indang affidavit repringdanga osang ka renema liasü.

Ajioda tang India nung

sensaktiba MLA ji BJP MLA, Nirmal Kumar Dhara lir ta parnoki bushitet.

Arrshi küm 41, Dhara indang affidavit nung shia aliba agi, pa meyong rongsenji sen 1,700 jenjang dang lir.

Dhara ya 1982 küm March 31 nü aso aser pa indang bank account nung sen ka danga maliba dang masü saka pa meyong ki mesüra gari mali aser insurance policy-a mali.

Dhara indang personal loan mali mesüra senti oset kecha mali.

Dhara ya Kushmuri yimtsung nungi lir; pa ket nung ali mesüra kiojen kecha mali.

Pa MLA makümdang pai tuition agiba ajanga dang sen tera aazüka liasü. Pa ya tution tesayur ka liasü aser pa kinüngtsü, Anuradha Dhara-a kecha meinyaker. Tena jala ka sosema lir.

BJP MLA, Dhara-i Burdwan University nung MA renema liasü aser 2009 küm post-graduate asü.

2021 küm West Bengal Assembly elections nung pai BJP ticket nungi Indas menden nung toktepa liasü aser iba election nung pai vote tali 7,220 agi Trinamool Congress candidate, Runu Mete madak takok ngua liasü.



July 23, 2023 nü Jantar Mantar, New Delhi nung Congress lenirtem- Ajay Maken, Tariq Anwar aser J.P. Agarwal nung densema party lenirtemi Manipur nung rara anema longkak aitdang tangokba noksa nung angur.

### Manipur nung tatalokba ajanga alimai India aitsür: Salman Khurshid

#### New Delhi, Chiteni/July 23

(Agencies): Amongnü Congress lenir aser taoba mapang Union Minister, Salman Khurshid-i, May 4 nü Manipur kübok Kangpokpi district nung tetsür ana mangsa anir senzüba tatalokba atema metetdaksü.

Bihar nung tzümetzung agi kongshiba tesemtem nung teyari balala agütsü atema Khurshid aser pa kinüngtsü aser taoba mapang MLA, Lousi Khurshid nati anogo ananü Katihar district semdang.

Tesülen pai yimti nung osangbenertem den jembia liasü.

Paisa, "Ni alima dang India ya tamajung masü, ta shiner. Ajisüaka nisung tamajunger kar lir, aser parnok nem temerenshi

agütsütsüla," ta ashi.

Khurshid-i, Manipur nung tamajung tatalokba ya India noksa den mesendakteptsüla, ta ashi.

Taoba mapang external affairs minister-isa, Manipur tensa atema Ato kilonser, Narendra modi-i ola madokba atema Congress lenir, Sonia Gandhi-i pa (Modi) dang tasümdangba akar, ta ashi.

Ato kilonseri iba tatalokba dak sendakba nung indangindanga sangdong ka agütsütsüla, aser ochi jembitsü atema menoba kuli agütsütsüla, ta Khurshid-i ashi.

Tasümdangba ka langzüdang pai, Manipur nung iba tatalokba ajanga state sorkar dang masü saka Centre sorkar danga tasümdangba akatsü nungdak, ta ashi.



New Delhi, July 23, 2023: Amongnü Delhi Commission for Women Chairperson, Swati Maliwal-i Manipur semdangtsü atema Delhi nungi apusotsü mapang lai osangbenertem den jembidang tangokba noksa nung angur.

### India nung CM talangtiba inyaker tanabubaji Naveen Patnaik kümogo



BJP MLA, Nirmal Kumar Dhara

#### Bhubaneswar, July 23

(Agencies): India nung Chief Minister talangtiba inyaker tanabubaji Odisha Chief Minister, Naveen Patnaik kümogo.

India nung Chief Minister mapang talangtiba inyaker tanabubaji taoba mapang West Bengal Chief Minister, Jyoti Basu liasü; pai küm 23 ser anogo 139 chief minister inyaka liasü, ajisüaka July 22 nü Odisha CM, Patnaik-i pa ajangtetogo. Odisha nung kümsük (term)

pongububa Chief Minister inyaksang, Patnaik-i 2000 küm March 5 nü Chief Minister tenangzüka agia liasü, aser tanü tashi chief minister inyaker. Pa CM menden nung mener küm 23 ser anogo 140 jungogo.

Taoba mapang Jyoti Basu-i 1977 küm June 21 nungi 2000 küm November 5 tashi chief minister inyaka liasü.

Tang tashi India nung mapang talangtiba Chief Minister inyaksangji Sikkim nung taoba mapang chief minister, Pawan Kumar Chamling lir. Pa 1994 küm December 12 nungi 2019 küm May 26 tashi Chief Minister inyaka liasü (küm 25 dak tali).

Naveen Patnaik tebu, Biju Patnaik süadokba sülen 1997 küm pai yimtenren nung ajemoka liasü. 1997 küm December 26 nü pai Janta Dal toktsür tebu nungtem nung party tasen ka tentet.

Patnaik-i 1998 nungi 2000 tashi Steel & Mines Union Minister-a inyakogo aser 1997 nungi 2000 küm tashi Aska nungi Lok Sabha MP liasü.



## TIR YIMYIM YIMOBILEM (EDITORIAL)

DIMAPUR TENTONÜ, CHITENI (JULY) 24, 2023

### Tonga oa anepalur asütsüla

**T**awa Kohima town nung MLA kati pa constituency kübok aliba Govt. primary school aser mozü kitem ajak tonga-tonga oagi semdanga jajaba jagi par constituency purtem asoshi dang masü saka külem yimsüsür medemertem danga pa jiluji ajizüka inyaksüsa mapa agi ajungshiogo ta bilemer. Ashiko, MLA-baji par constituency nung lapoka aliba Govt schools aser mozü kitem sema jajadang, school kar nung tesayur peria mali, kar nungbo kaketshirtem dang nungi tesayurtemang teimba, kar nungbo tazünger mali, karbo mapai maru ser ita sen achir, kar nungbo mendena peria mali, jara tapok aser kilema tapok, tsüngbangbo mali ta ajurur alitsüa akok. Ano, ashiko school aser mozü ki karbo küm junga melapokdangbatema ngur alitsüa akok. Aji oda, school aser mozü kitem sema jajadang, nübortem jajaba gari aser tetsüng lenmang jenjanga meteter alitsü. Idangji, koba tesem nungsa kilentzü junga mali aser koba tesem nungsa janaona junga meindoker, item tesemtemjia reprangtetter alitsü. Iba ama nübortem aliba tesem tetsüng agi sema jajadang nübortem aliba tiaa angutsü. Iba amaji kidang nungi ayazüka, peisasa tonga oagi school aser mozü kidang inyaktertem den parnok inyaktak tesem nung parnoki inyakba osang aser parnok tebilemstü aser nungdak lemsatepba jagi inyaktertema temulung asür aser ano tali temulung tagütsüba inyaktü mulungteter. Aji oda, karbo küm nungi küm anogo kata sodi magii pei mapa nung kanga temulung agüja inyaker, ajisüaka pei MLA-bai aji memetet aser ashiko sempet agütsüba anogo nungbo, pei mapa nung temulung magütsüba aser mapaia junga maoba nisungba nemang sempet agüja atemtsüa akok. Iba jagi kin ka mapa nung tezütangtep alur. Kin ka tashi ait tenzükdakji inyaktertemi, kechi mapa nung tenzükdir tenzüaka, pei mapaji linük tenzüka mapa ta bilema inyakba nungi tenzüker aser ibaji yimten yimsüsürtemi reprangtetsüla. Aji oda, pei yimten kübok tenzükeritemi shitak inyaker asü meinyaker ta metettsüba jagi tsüngdong oagi pei nuk agi reprangtsüla. Assam nunga Chief ministeri anir parnok minister aser officer-tem ajak pei pei lemsükba yimtsüngtemi orr yangji yimtaklirtem den külemi anogo 15 monga, terenlok mapatem shitak inyaka ali mali aser government-i sentong tapu balala ajanga yokba senotsütem shitakba nübortem (beneficiaries) ket atonger asü matonger, itemji reprangdanga inyaktü lemteta lir. Iba anogo 15 piyongji yimtsüng balala nung yimtaklirtem den külemi yipzüka jajatsü. Atangji, ibajiang shitak minister asüba mapa asütsü. Iba amaji kodang minister aser MLA shiai minister asüba tetezü 'nübortem nungdak reprangteta anepaluba' ta meteta inyaktü, yimten nung yimsüsüba mapaji Inspector mesüra pastor mapa ama kümer jangratema inyaktü aser nübortem asoshia kibong nung tsürabur tajung aliba metetmeteta shisamebului aliba ama alitsü. Aji oda, kodang yimten yimsüsürtemi pei mapa nukjidong aser tetezüji meteta nübortem tenzükdir, Kohima aser Dimapur nung masü saka pei yimtak aser pei constituency nung anepdang aonunga pei nübortem ajurutetsüsa ali tenzüksü. Idangjibo, Kohima nung minister ki balaka menüngdaksü saka tatar senden amen dang aser nübortem asoshi office-tem nung mapa alidang khen khen anenzüka amongtsü atema Legislators' Home ka MLA-tem ajak sademsadema anenzüka mongtetsüsa yanglutetra aji agi peritsü. Joko, asenoka shisatsü nung tain akümer aser temetetba nunga renloker asünungji, akhidang ama pei tenüng den pei azüngba degree dena enoka kidang itaka ayuba tangatetba shisatsü amato masü saka libalirubo tongmelang saka nübortem asoshi inyaksüba mapabo tulu ta asütsüsa asenok dak tangatetba aser temetetba shisatsü alitsü nungdaker. Tang Kohima nung MLA kati inyakba amaji aser Assam nung minister-temi yimtsüngtem nung yipzüka terenlok mapatem repranga jajatsü mulungtetba amaji, asen lima nunga MLA shia pei constituency nung lia, ita shia government schools, offices aser mozü kitem sema oagi inyaktertem ajurua shisalemsatepa jajara, idangjiang 1963 küm kümtetba Nagaland government shia arutsü.

## OLEMSABANG

### ASEN NAGA NUNGER YIMDEN TEBILEMSTÜ YA KODA TEMBANGTSÜ???

~ L.Kika Pongener.

India nung British nung dang nungi nujsio meshiba mapang nungi, asen Naga nungera asen tsüraburtemi nujsio bushiba mapa ya tenzüka meshia aruba joko küm 60-70 dak tali sua aor. Ajisuaka, tanü tashi telemtetba ka dangi maruteti atsülanga ojen odagi. Aji oda, yakta telemtetba ka dangi arutsü amai yimlaseta ata-a aliba, ano tawa tanübo otsü/osang balaka, Naga lima tilaka yagi tesem karbo balaka razüka aotsü amai dang otsü/osang angashidang, ni ama mashi-malo nisungtembo ongko madokteti kanga mangmanger. Nagaland ya 16 Point Agreement nung ajemdaker State ya aküm, aser iba Agreement nung India lima nung tanga State-tem dang nungi khenyongi 'Status' balaka nung State akümba otsü/osang angazüka aru. Kechiyung nutsüng yongsuk aser litsü tasazük agibo State ka asütsüsa kecha agia langa malitsü sudi. Ano maongka tajung kaji India nung temzüng-ozüng nung tanga State dang nungi Naga nung atema balaka Arla-371 (A) enoksemba yagi asen Naga nung talila maongka ka agir. Aji oda, küm paikati meranga inyaka, rara-a arur, nujsio bushidang asen Naga nung lennir tajung, senso tajung aika azü tokshia taküm lalur, tang tatem nung mezüng jenjang dang nungia teküpokba jenjang ka nungang tempangtsü asü naa...???...ta ni ama mashi-malo nisungtem-bo kanga tsüremseta bilemer. Küm ishika sua ogo, Jammu & Kashmir lima nung atalokba asenok ajaki angashio go aser nguogo. Jammu & Kashmir lima Indian Union küpok 'Full Fledged State' ka aliba ana küma lemdanger, State jenjang nungi 'Union Territory' jenjangi aludaksür, Article 370 'Special Status' agüja aliba agiena-adokba, ibala tia to asen Naga lima nunga bentshitsu sayatenyar asü (?)...ta ni ama mashi-malo nisungtem-bo kanga tsüremseta bilemer...???!!! Otsüla-oboula nungeri tatishitsu jembia aruba, "Kü tembabo kümli tajung'ar senpet kecha mebensülü"...ta jembia aruba ama...Asen Naga nungerberbo sen agütsüra akoseta pelatsüa ta ser, sen agi mesuzüksü, mesushir asü...???!!!...ta khenkhenbo shisadanger.

Ano tip külen 'Uniform Civil Code' (UCC) indang kanga bulua jembir, iba temzüng ya shidak mapa küma inyaksüsa kümra, asenok tamangba yimsu nunga kongshitsu sudi, aser asenok tanü tashi sadem-sadema amanga aliba ya sadem-sadema mamangtetsüsa tensa tia ka arudisu...ta ni ama mashi-malo nisungtem-bo kanga tsüremseta bilemer. Ni ozüng metetba nisung ka masü, ashiko kü tangatetbaji tai asütsü akok, anungji kü tangatetbaji tai sura metongshia agitsü mepeshir. Tanü India lima nung Khristan-tem aser kin tilatem tamang yimsu dak ajemdaker reshikangshi tia nung lir. Talisa, Khristan yimsu lennirtem tepsetba, tenlaki raksatsüba, tenla kidang injang kahloktsüba aser bomb pokloktsüba, yamala tensa tia atalokba 'Social media' nung otsü/osang angashir aser angur. Ano tawa asen kidanger Manipur lima nung atalokba otsü osangtem angashidang aser angudang kangasa sungmanga bilemer. Manipur lima nung kin kar nem 'Schedule tribe' jenjang agütsütsüba, ibaji kin kari anema nokdakba agi mepetmesu ya adoka ta angazük, aser ibala meji raratepdang, meimlaba mapa ka, Khristan-tem tenlaki raksatsüba aser Khristan-tem anema tashiyim mapa inyakba angudang kanga sungmanger...???!!! Kechi küli agi mepetmesu adok, iba dang nungi mapa balaka inyaksangshiba angudang kanga sungmanger...???!!! Tip külen Center nungi yimsusur tazüngpur tonga arua tatalokba ajunga ngur sernung, tanü tashi tensa tia tajungba melenshiba kecha balaka mangur, aser yimsusur tekolakpuri iba tatalokba atema suoki yia bilemba olen kata mali zübazüba-a toktsür amai angudang nubur aika sungmanger...???!!! Ano state sorkar nung yimsusurtemi tensa tia tazüoktsü tim mazüoki zübazüba-a toktsür amai angudang nubur aika sungmanger...???!!! Anungji iba mapa ya bangdak tashi kari nungita yariba agi temulung ulua inyaker asü (?)...ta temulung melemi bilemstüsa mapa jagi sayur. Anungji North East India nung aliba Khristan-tem ajak asoshi iba tatalokba yagi, joko zübazüba-a meli-i kanga saksalema, meita alitsüba mapang kati menepogo ta bilemer. Talisa, asen Naga lima nunga NBCC küpok kin shia mungdangtem aser ABAM nung tenzükeritem, lim arogotem nung tenzükeritem aser arogopur ajungai iba ya kanga suoki yia bilemstüba aser saksalema alitsüba mapang kati menepogo. India lima tanga State nung aliba Khristan-tembo Khristan yimsu amangba atema kanga reshikangshiba tia nung lir, saka tia kaa asenokbo tanü tashi Khristan yimsu amangba atema shingaia reshikangshiba otsü mali. Tatishitsüka...India lima nungi tanga yimsu amangba telok kar arur, Khristan yimsu toktsür Hindu/Muslim/Budhist etc. yimsu dangi meyipang ta ser...Election nung alemba amai Sen talep-talep ammer lema arunungbo, ashiko, asen Naga nungerberbo ajak mela-mela meyipa aotsü kecha meteta mali. Talisa, tangar kin oda yutsür asen Aotsür Aor tamasa meyiptsü sudi ta bilemer, kechiyong sen ya asen Aor-isa temeimba.

Asen Naga lima nung Election agiba shia, Candidate-temi Election Campaign/Canvassing ajak nung Naga nung yimden tebilemstü tatempang telemtetba ka mekateti aliba ya tatempang telemtetba 'Solution' ka dangi bentsür arutsü ta bangpettsü amai jembitsu aser nangzüksü. Ano Election temer sorkar tasen yangludang Naga nung yimden tebilemstü ya tatempang telemtetba ka agitsü atema 'Opposition' maliba sorkar yanglur-a ta nubur dang sangdongtsü. Ajisuaka, tanü tashi mapa küma inyakba kecha maka, saka lia lia ano tawa tanübo Naga lima tila ka yagi tesem karbo razüka aotsü amai dang otsü/osang angashidang...Ya shidak asü koda...???...ta nuburtem kanga sungmanger...???!!! Aji oda, asen Naga nung yimden tebilemstü ya koba tashi ka nung tempangtsü ???...ta nuburtem kanga sungmangteper. Anungji asen Naga nung senso ajaki temulungjang taroktiba nung ayutsüba tongtipang 'o' kaji... "Longjemba agi nokdaker aser lemsaba agi laor". Arung asenok ajak ka küma longjemdi aser asen Naga lima nujsio asoshi nukjidong ka ser nokdakdi.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**



World Harvest Global Tir, Jacob Ebersole-i South Carolina nung tang mezüng 'crusade' ayongzüka akatsü, ta metetdaksüogo. Tawa World Harvest teloki West Africa aser South America nung crusade ayongzüka agiba mapang nisung 66,000-i Khrista agizüka liasü. Taküm May ita nung World Harvest Global teloki Lima, Peru nung ayongzüka crusade agidang tangokba noksa nung angur.

## Benue state nung Islamic kiralongrartemi Khristan trok tepset

**Abuja (Nigeria), July 23 (Agencies):** Taoba Amongnü Nigeria kübok Benue state nung Fulani telok densema Islamic kiralongrartemi Khristan trok tepsetogo, aser ibaji densemabo tesüiba hopta asem tsüngda Benue state nung Khristan 37 tepsetogo. Amongnü (July 16) aonung 8:00 ako meta kiralongrartem motorcycles nung arua Ushongo County kübok Khristan yimsüng ana- Igba-Ukyor aser Tse Baka amak, ta Ushongo County nung alir, Bemgba Iortyom-i metetdaksü. "Kiralongrartem den Fulani telok arua Igba-Ukyor yim tama amakba mapang nung parnoki Khristan pongu tepset. Iba sülen parnoki Tse Baka

yimdak Khristan ka tepset," ta Iortyom-i osangbener nem metetdaksü. July 8 nüa kiralongrartemi Ukum County kübok Khristan yim ana amakba mapang nung Khristan 30 tepseta liasü, ta the Ukum council chairman, Kartyo Tyoumbur-i metetdaksü. "Kiralongrartemji parnok 20 shi liasü aser parnok ket nung raraba hadir bena liasü. Parnoki ki aika rongdoktsüogo. Khristantem tasü mang 30 nguteta liasü aser samar aliba Khristantem tang tebushidak," ta paisa metetdaksü. Asürtemji Universal Reformed Christian Church (NKST) aser Roman Catholic Arogo na nungi züngsemtem liasü.

June 30 nüa kiralongrartemi Logo County kübok Tse Anwhwan yim amakba mapang nung Khristan ka tepset aser ana yiruja liasü, ta Council Chairperson, Salome Tor-i metetdaksü. "Prangpong amer telok jagi injang khaloktsüba mapang nung NKST Arogo nung züngsem, Saater Apera khaset aser Khristan ana yirutsü," ta Tor-i metetdaksü. Benue state ketdangsertemi sorkar dang Khristantem anema inyakba nokdangtsü atema mera agia inyakdaksüner, ta mepishiogo. Taküm June ita kija nunga Fulani telok den tanga kiralongrar telok balalai Benue state nung Khristan 46 tepsetogo.

## Alima nung Arogo tekaratiba ainba linükji Iran lir

**Washington D.C., July 23 (Agencies):** Küm 50 tejaklen Iran nung Khristan nütsüng ishika dang liasü aser item telokji Armenia nunger, Chaldean nunger mesüra Assyria nunger liasü; parnok lakh ishika Iran nung putu aika lia aruogo, ta International Christian Concern (ICC)-i metetdaksü. 1979 küm Iran linük nung Islamic Revolution matalokdang Islam yimsü toktsür Khristan yimsü agizükertem noklang ishika dang liasü. Islamic revolution ajanga secular yimli atsüngdokba sülenbo Khristan nütsüng ishikaji-a samadoktsü aser Islamic Republic of Iran nung Sharia ozüng ajanga Khristantem kanga reshikangshitsü, ta bilema liasü. Tesüiba küm 44 tsüngda Iran linük nung Islam yimsü toktsür Khristan yimsü agizükertem kanga reshikangshia arudar. Iba linük nung Farsi oshi nung Laishiba khenyongi memelar aser tangar den Khristan yimsü

lemsatepbaji ozüng alema lir. Tesüiba küm aika tsüngda linük nung Khristan lenirtem aika pua asüngdangyaogo aser lenirtem aika Evin Jail nung puoka lir. Iran nung Islam yimsü toktsürtem aika nem tasüba temerenshi obendanga agütsüogo. Iran sorkari Islam yimsü toktsür Khristan yimsü agizükertem magizükertem aser parnok nem tamangba yimsü temeden magütsür. Iba ama tensaji liaka tesüiba küm 10 tsüngda alima nung Arogo tekaratiba ainba linükji Iran lir. Osang angazükba agi, iba linük nung Islam yimsü toktsür Khristan yimsü agizükertem million 1 dak tema kümogo. Islamic revolution sülen Tsüngremi Armenian, Chaldean aser Assyrian Arogotem amshiba ajanga Iran nung Khristan nütsüng kanga züiner. Iran nung Armenian, Chaldean aser Assyrian nunger Khristan nütsüng kanga ajema 100,000 shi dang kümogo, ajisüaaka Islam yimsü toktsür

Khristan yimsü agizükertembo iba (100,000) dang nungjagi terben agi teimba kümogo. Talisa Khristan yimsü agizükertem tasenpurtemi medemer aser kibong züngsemtem den yimsü tasen lemsatepba ajanga-a Khristan nütsüng renloker. Iran tesem ajaklen House churches amenoker aser ibaji ajanga tamangertem pei tamang jenjang nungi matsüngshir. House churches, online media gospel programs aser nisungtem tsüngda Khrista osangtajung lemsatepba ajanga linük tesem ajaklen Khristan nütsüng renloker. Reshikangshia ajanga Iran nung Khristan yimsü samatsüsa liasü ajisüaaka mamangteti Arogo ang kanga keraa ainer. Tanü-a Iran nung Khristantemi tayongzüka jenti ajangshir. Arogo kanga ainer, anungji tamanger tasenpurtem nungtsüsütsü atema kanga nungdaka kümogo. Iba dak alia Khristantem maneni reshikangshiba ajanga tamangertem longjema alitsü nungdaker, ta ICC-i metetdaksü.

## ANOGO ABEN TSÜNGREM DEN

### Taochi aser tesünep

"Asen Tebu Tsüngrem aser Kibuba Yisu Khrista nungi nenok dangi taochi aser tesünep süang."

- Rom 1:7

Efesa nung arogo teku dangi züluba shiti shia "Nenok den taochi liang, aser asen Tebu Tsüngrem, aser Kibuba Yisu khrista taochi nenok den liang" ta tenzük. Ibai Pauli taginüba o ka dang züluba masü, saka ochi temeim agi zülü. Ibai teti tesütep o talisa küm tasen ka tenzükdang ibai kanga tapet lir. Idaki ochi tulu asem dena lir, Tebu Tsüngrem, Kibuba Khrista aser tamangertem asoshi temoatsü. Asenok tesüngmangtsü mapang ka nung lidar. Mangashiba osang angashir, manguba oset angur, meimlaba tashidak agi nisung jenti asür, scientisttem raraba oset akidang meyanglutet aliba yangluteta amshir. Alima kanga dang karaa melenshia aor. Telatet kecha maka kin kati kin ka raksatsütsü teraksatsüba tashi tait oset adoker. Iba ama lima ka nung alidang asenoki tarutsü jenokdak atema bilemer aser asenok temulung alemdakji Khrista tesayuba, tematiba Tsüngrem indang tesayuba nung anisüngzüker. Ibaji dang teperi masü. Iba dang tali tematiba Tsüngremji asen Tebu lir. Ajak Pai yanglu, ajak Tebu Pa asüning alima ajunga nung aliba meimchir tembar kuma tesünep nung alitsü aji Pa nükjidong. Saka ano Pauli Khristaji kibur ta ashir. Tejen Lai Yihova aser Tasen Lai Kibur ta amshi. Tebu aser Techir kasa dang. Tetenzük Techir Tebu den liasü, aser Pa ajanga ajak yanglu. Kibubaji teti tatem maka Tsüngrem chir, shiba dak meimchir aria bilemba Tsüngrem ain alir. Pa otsü nung kibur. Pa chuba ka ama arutsü asenoki yongya atar. Pa kodang arutsü shingai memetet- Pa taküm küm arutsüa shibai metet!

Pauli taochi aser tesünep asenok nem agütsütsü sarasadem. Item o ana ya jangratemsü otem lir. Yangji taochi tetezü Tsüngrem temeshi temeim asenok nem agütsüba lir. Tesünep tetezü junga aliba. Aiben asenok Khristantemi asenok shidakba nungdakji mangateter! Sen kara, temaba jenjang nung lira, sempet tulu kara, mesüra anema lira, asenok junga alitsü ta aikati bilemer! Masü, asenok shidakba nungdakji "taochi aser tesünep" lir. Tsüngrem tenüng sangang.

## Karnataka tatar senden nung anti-conversion ozüng anema bill mebenok

**Bengaluru: July 23** Karnataka state Cabinet-i (Agencies): Karnataka nung Karnataka Protection of Right to Freedom of Religion Act, anti-conversion ozüng 2022 agientsü atema agientsü atema telemtetba agiba sülen Law Minister, H K Patil-i, Cabinet senden nung July ita nung tatar senden aliba mapang iba ozüng agientsü atema telemtetba agiogo, ta metetdakja liasü. Osang angazükba agi, sangküm Lok Sabha election magi tashi anti conversion ozüng aser nashi tepsetba tenokdangba magieni alitsü atema state sorkari telemtetba agiogo. Karnataka Protection of Right to Freedom of Religion Bill anema Khristantem densema minorities aser Opposition party temi nokdaka liasü saka yaküm September ita nung taoba mapang BJP sorkari iba ozüng agizüka liasü. Taküm June ita tomlen liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Retisen**

(adj) yimkong telok telok sena aoba, intisen (whole community moving out in groups)

\* Aortem Chungliyimti nungi **retisena** oma.

**Retreta**

(v) ajangajanga, züngzünga, pungpapungpaa masü ( seriously, heavily)

\* Sayutsüngiri ashiba o ajaki **retreta** agizük.

**OLONG PAITEP # 6585**

	1			2	3				
4			5						6
					7				
	8								
	9			10				11	
						12			13
14									
						15			

**TIPIEN**

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsümapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

**LANGTSÜNGLEN**

- 1. \_\_\_\_\_ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. \_\_\_\_\_ kibur - (5)
- 13. Tebur tembar tsüngda jatepba - (4)

**OLONG PAITEP # 6584 TELANGZÜBA**

**TIPIEN :**

- 1. Awatsüng, 5. Aria, 6. Alulem, 8. Otsü, 9. Galil, 12. Atema, 14. Jila, 16. Pungzü, 17. Rone, 18. Rongrong.

**LANGTSÜNGLEN :**

- 1. Asang, 2. Ajunga, 3. Gado, 4. Mazük, 7. Meimtep, 10. Bangso, 11. Ajuru, 13. Azüng, 15. Aiür.



**MILLIONAIRE KA, PA INDANG LAWYER-I ASHIKTSÜR.**

Millionaire ka indang PS ka, tenaprong tenarong tajak den o mejembiteter, (deaf and dumb)saka kanga tekolok techira ka liasü. Mapang tatsüka tsüngda nung Millionaire jagi pa account nungi Million ter samaogo ta puteta o tajung agi asüngdang nung PS jagi kecha memetet ta sign language agi langzü. Tesüsa Millionaire jagi Lawyer ka, shibai sign language metet nung mongin liasü, paji jar asüngdangyadaksü.

**Lawyer (sign language agi):** Senji nai agiogo ta ajaki metetogo, anungji shitak dang shiang.

**PS(sign language):**Ni khenyongi memetet.

**Lawyer :** Pai kecha memeta asüra. (Idangji Millionaire jagi pistol agi PS dakji teneter asüngdangang ta ashir)

**Lawyer(sign language):**Nai shitak meshira tang tekolakji jaksaa akatsüa asüra.

**PS(sign language):** Yimlibilema kü dak teka ta shiang, ni sen ajakji Brown suitcase ka nung seper, titi dong züng nungto rema lir.

**Millionaire :** Kechi ashir?

**Lawyer :** Tekolak jiang maha temang ajak ajasaa kalokjang asüra! (Baaang)

- Lilir : WhatsApp

**Mizoram-i Meitei nunger nem teküzmükba agütsütsü nangzük**



Meitei nunger Mizoram toktsür aoba noksa nung angur.

**Aizawl, Chiteni/July 23 (Agencies):** Mizoram sorkari state nung aliba Meitei nunger nem teküzmükba agütsütsü tenangzükba agütsüogo. Sorkarisa parnok dang olulu osang dak tamang makatsü mepeshia liasü.

Manipur nung tetsür ana dak mebenshitsü yimya benshiba ajanga tensa mejungi aliba mapang taoba mapang telungpur telok kati state toktsür aotsü asoshi ashiba sülen Meitei nunger aika Mizoram toktsür oya aliba mapang sorkari iba tenangzükba ya agütsüogo.

Mizoram home commissioner aser Secretary H. Lalengmawia-i, Meitei kin nungi lenirtem den Honibarnü senden ka ayongzükba amen aser parnok teküzmükba kübok toktsütsü tenangzükba agütsüogo, ta official sangdong ka ajanga metetdaksü.

All Mizoram Manipuri Association (AMMA) lenirtem den senden amenba mapang Lalengmawia-i, sorkar tenzükertem aser kaketshirtem dang Peace Accord MNF Returnees' Association (PAMRA)-i tetuyuba agütsüba dak ajemdaker state toktsür maotsü asoshi külem Meitei nungertem nem osang agütsütsü aser parnok ajugnshitsü shia liasü.

Paisa lenirtem dang PAMRA-i osang agütsüba ya media kari aibelena meyipzükba lir, ta ashü.

Home secretary-isa PAMRA lenirtem den senden ka ayongzükba menogo, shirnoki iba osang ya Mizoram nung aliba Meitei nungertem dang kümdangshia alitsü mepeshia tekümdangtsü metetdaksüba

ka dang lir ta jangjatsüogo.

Parnoki osang agütsüba mashiyimi meyipzükba prokshiba atema sasaseto bilemba lemsatepba mapang PAMRA lenirtemi state nung kecha tetsükdaksü madoktsü aser yimjung aser tesunep nung alitsü atema iba amala osang mesangdongtsü atema telemtetba agia liasü.

Hokolbarnü PAMRA secretary general C. Lalthenlova-i, Mizoram nung Meitei nungertem teküzmükba kübok toktsütsü atema parnok shisabulua bilemer ta ashü, kechiyong tetsür ana mezüngmeshia amshiba video prokshiba sülen Mizo nunger lanurtem aika meit adoker ta ashü.

Paisa, nüngdak makaba nung lendong balala atalotsü aliba nungi jenboa alitsü atema parnok kümdangshia alitsü asoshi temepeshiba ka agütsüba dang lir ta ashü. Tensa mejungi akümba mapang Meitei nunger aika pei state-i meyipaogo ta police-i ashü.

Meitei nunger meyirejang ishika Mizoram nung lidar, parnok ya timba Manipur nungi aser south Assam nungi lir. Kasa mapang nung Kuki tsür ana mangsa yimtongsüa anir senzüba video July 19 nü prokshiba sülen state nung security akangshio.

Mizoram Deputy Inspector General of Police (Northern Range) Lallianmawia-i ashiba agi, Mizoram University aser Zoram Medical College densema institution aser tesem kari security yokogo, kong Meitei nunger aika lir.

Paisa, lendong balala ataloktsü aliba nungi jenboa

alitsü aser Meitei nungertem teküzmükba kübok toktsütsü atema sepaitemi mapangshia tesem balala meita odar, ta ashü.

Pai ashiba agi, Honibarnü tashi nung lendong kecha matalok aser tarutsü nunga iba amala lendongtsütong kecha mataloktsü ta ashü. Paisa, police department-i Meitei nunger lenirtem den mapangshia tongtepratepa arudar, ta shisem.

Lallianmawia-i ashiba agi, PAMRA-i osang agütsüba agi masü saka July 25 nü lokti tentet balalai longkak aitba sentong ka ayongzükba agitsü asoshi ayongzükba aliba agi Meitei nungertem tsübuteper.

Meitei nungertem longkak aitba sentong tembangba sülen lendong ataloktsü akok ta tsüba bilemer, ta pai ashü.

Kasa mapang nung Young Mizo Association (CYMA), central committee-i Honibarnü sangdong ka ajanga Meitei nungertem dang longkak aitba sentong ayongzükba atema tsüba malitsü metetdaksüba den parnok dang yimjung nung alitsü atema mepeshia metetdaksüogo.

Iba lokti tentet yagisa Manipur sorkar dang Imphal nung Mizo nunger kaketshirtem küzmükba toktsütsü atema mepeshia metetdaksüogo. Principal consultant for civil aviation J. Lalhmingliana-i ashiba agi, Honibarnü Meitei nunger 65 tashi tayimtsü nung Imphal-i ogo.

Maneni Hombarnü Aizawl nungi Imphal-i aotsü aliba tayimtsü indang ticket-a ajak mekatokogo. Police-i ashiba agi, Meitei nungertem aika bus aser tanga gari balala ajanga par state-i meyipaogo.

**MHRC Kuki aser Meitei nunger tsüngda mangatetep adokba bushisüngdangtsü tuyu**

**Imphal, Chiteni/July 23 (Agencies):** Manipur Human Rights Commission (MHRC)-i Manipur police tekolakba dang May 3 nü Kuki aser Meitei nunger tsüngda mangatetep adokba sülen meimchir temeden anema inyaksangshiba bushisüngdangtsü atema tetuyuba agütsüogo.

Churachandpur district nung alir Naorem Ibomcha Singh-i ken o ka benokba dak ajemdaker iba tetuyuba ya agütsüba liasü. Singh-i ashiba agi, Kuki nunger telungpurtemi district nung Meitei nunger anema

inyaksangshia aser pa indang gun house rakpoka tur auya liasü.

Singh-isa, ITLF, Kuki nunger telungpurtem aser Kuki-Zo kin nungi nüburtemi shimer aliba lenirtemi azütokshi lendong balala adokdaksütsü atema teyari agütsür, ta ashü.

Pai ashiba agi, Meitei nunger densema nisung meyirejang aika indang meimchir temeden anema inyaksangshiba ya ITLF aser ZRA-i rongmesoba lir.


MHRC-i police dang IGP rank tema nung aliba police officer ka nem iba ken o ya bushisüngdangdaksütsü asoshi

tetuyuba agütsüogo. Commission-isa state sorkar dang Protection of Human Rights Act, 1993 kübok Section 27 (1)(b) sülen tashi anga anidaksü aser iba tetuyuba ya takaratiba nung benoka inyaksangshitsü atema asüngdangogo.

Manipur nung Kuki aser Meitei nungertem tsüngda tensa kanga mejungi aliba mapang ka nung iba tetuyuba ya agütsüogo.

Kin ana ya mapang talangka nungi mangatetep adoka aruogo aser tawa asendenshir mangatetep tulu adoker lir.

## Israel PM Netanyahu mozü kidang lir, pacemaker inoktsü



**Jerusalem, Chiteni/July 23 (Agencies):** Judiciary nung mangatetep aliba temelenshi atema parliamentary vote agitepsü lia Israel Ato Kilonser Benjamin Netanyahu temang mejungi mozü kidangi ao aser pa pacemaker inyoktsü.

Deobarnü Netanyahu indang office ajanga ashiba agi, arishi küm 73 tain lemur ya sedation nung ayutsü aser pa melen Justice Minister Yariv Levin-i inyaka atatsü.

Video ajanga sangdong tatsüka agütsüba nung Netanyahu-ia pa temang junga lir aser mozüki nungi aluli pa indang sentongtem anir inyaksü, ta ashi.

Temang nung tzü ajema akumba ajanga mozü kidang mung hopta ka lir iba sangdong ya Honibar aonung ayatirm sülen agüja liasü.

Ajidang masü anu obandangba tsütsü temelenshi

anema nüburtimi longkak aiter anogo ka sülen iba osang ya angashir.

Obendanger temi sorkar telemtetba agientsütsü atema vote tatembangba agitsü lia nisung meyririjang aika Israel nung aliba yimti-yimdong nung Honibar aonung adenshi aser ano meyririjang aika Jerusalem bushia ao aser Knesset mesüra parliament koma amen.

Netanyahu ya Tel HaShomer nung aliba Sheba Medical Center nung emergency procdure aotsü, ta Israel ato kilonser indang office ajanga ashi.

Sea of Galilee nung südoksünema amungdang tatsük nungi kumzüka maliba ajanga Netanyahu ya temang nung tzü ajema akum aser iba mozüki nung July 15 aonung mejanga liasü.

Pacemaker inoktsü atema pa Sheba-i meyipa shilangba

ajanga pa temang nung timtem ya tulu lir ta ajiteter.

Video nung Netanyahu-i ashiba agi, taoba hopta mozüki nung amungba sülen pa temang nung monitor ka inok aser Honibar aonung iba monitor nungi ola adokba sülen pa pacemaker ka nungdaker ta angatet.

"Ni junga lir, saka doctor temi ashiba angatsüla," ta pai ashi.

Nisung ka temolungjang kanga meilongi arakzüdang pacemaker ya amshir. Iba ya temolungjang agi mapa meinyakdanga amshir.

Iba oset yagi temolungjangi electrical pulses yoka temolungjang arakzüba shidak yutsür aser temang junga alidang ama temolungjang ajanga temang shilem balalai azü yoker.

Deobarnü nungi tenzüka Hombarnü tashi parliament nung pa indang sentong benoka vote agütsüdang pa mozüki nungi alur alitsü ta doctor temi shiogo, ta Netanyahu-i ashi.

Obendangba tsütsü temelenshi arudaktsütsü merangba ya court azüoktsü nukjidong nung lir, ta iba onük anemer temi ashir. Netanyahu-i ochimashi mapa inyak ta ken o tejembidak aser pai ibaji magizüker. Ajisüaka kümsük trok buba ato kilonser inyaksangi iba temelenshi yagi sorkar indang kongsang balala nem tashi sako agütsütsü ta ashir.

## Sudan army aser RSF tsüngta raradang civilian aika tepset

**Khartoum, Chiteni/July 23 (Agencies):** Darfur region nung Sudan army aser paramilitary Rapid Support Forces (RSF) tsüngta rocket khaloktsütepba mapang civilian 16 asü ta osang lir.

Yangji aliba lawyers' union kati Honibarnü ashiba agi, iba lendong ya South Darfur state yimtiba, Nyala nung atalok.

Darfur Bar Association ajanga ashiba agi, iba mapang kibong ka nungi nisung ka yirur anüngba dak alaka züngsem ajak densema civilian 16 asü.

Chad anasa West Darfur nunga yimtiba el-Geneina densema tesem balala nung sniper temi nüburtim dak tenük yok aser yangji alir meyririjang aika arütsü alema ajen ta osangtem lir.

Sniper ajanga nisung ka khaset, ta Darfur Bar Association ajanga ashi.

2000s tetenzüklen rara tulu adoka raksatsür aliba region nungya Sudan indang mitkar tanishir ana tashi agi raktepa April ita tiyonglen nungi azüdokshi tali kumogo.

Iba rara ya Sudan yimtiba Khartoum nung April 15 nü tenzüker aser ita tatemlen Darfur tashi ao, aser iba rara ajanga Sudan nung nisung 3,000 shi süogo, ta ashir.

Ibai army tekolakba Abdel Fattah al-Burhan aser taoba mapang pa indang deputy aser paramilitary RSF tanishir Mohamed Hamdan Daglo tsüngta tashi agi raktepa nungi tenzüker.

RSF longsoa aliba Darfur

nung raraba ya tang Nyala temeket nung ataloker, aser aji masüdang el-Geneina nunga kanga sashia rara liasü.

Khartoum telung aser temeket nunga maneni rarar. Honibarnü linük yimtiba south tsütsü Gezira state nung aliba yimtsüngtem nung army temi tayimtsü amshia amakba osang lir.

White Nile aser Blue Nile ayongtem tsüngta ali temu aliba tesem nung nisung meyririjang aika jenoka lir, aser itemji iba rara ajanga tesem balalai jena aoba nisung million 3.3 rongnung dena lir.

Rara ya Gezira tashi ora, parnok ano jena aotsüsa akumtsü.

Parnok yariba humanitarian worker temia ainshitsüsa akumtsü, saka parnok tesem melenshia aotsü nung timtem jenti lir.

Telok anaprongi tongpang ulushiner, ta mongin temi ashir.

Rara tenzükerba mapang nungi Khartoum nung RSF jenjang tajungba lir, saka iba tajangzük ya tereprangtsü dang mesü, ta International Crisis Group (ICG) ajanga ashi.

Army temi July 15 nü North Khartoum nung kanga sashia amak aser suburban neighbourhoods ajanga tayimtsü amshia aoyi kumtsü, saka parnok takok mongutet, ta ICG-i ashi.

Kasa mapang RSF yagi Darfur-Khartoum lenmang amokbanga par sepaitem aser nok-nü maneni agütsütsü meranger.

## Cambodia election agiogo, PM Hun Sen-isa akoktsü imlar



**Phnom Penh, Chiteni/July 23 (Agencies):** Cambodia nung national election nung vote agütsüba tembangogo aser Ato Kilonser Hun Sen'er Cambodian People's Party (CPP) ajangasa mela-mela takok angutsü imlar, koba linük nung timi agiba election tatembangba asütsü ta aikati ashir.

Nütsüng yongsük million 16

aliba linük nung vote agütsütsü asoshi nisung million 9.7-i tenüng agüja alirtem atema voting ya Deobarnep 7:00 ako nung tenzüker aser nikongdang 3:00 ako nung tembang.

Mapang talangka nung tang tashi linük nung yimsü süa aruba CPP den ano party tila 17-i iba election nung shilem agi, ajisüaka Hun Sen den sashia tokteptsü nübu tejangja mali.

Par teloki linük indang national assembly nung aliba menden 125 prong angutsü imlar.

Pa den tokteptsü tejangja telokji Candlelight Party dang liasü, saka 'registration technicality' mechi election nung shilem magidaktsütsü May ita disqualify sütsü, aser ibai Hun Sen-i linük nung democratic yimya ajema kumdaktsüba tatishitsü ka lir ta aitsü.

Asia nung election ajanga shima lenir talangtiba inyaksang Hun Sen-i tesüiba küm 38 tsüngta Cambodia nung tashi ajak pa ket nung benden. Tang election nung takok anguba ajanga tashi ya par jabaso Hun Manet nem agütsütsü asoshi lenmang lapoker amai ajiteter, shiba Cambodian army tekolakba lir.

Tetokteper tejangja maliba aser Hun Sen-i tashiyim amshia opposition ajak ola madokdaktsüba mechi pa den tokteper aser human rights groups temi iba election ya aitsü.

Election agitsü lia opposition bukumertem apu, internet service agütsür dang

independent news aser information outlets tem indang websites tem amshiba nokdangtsü totuyuba agütsü.

National Election Committee (NEC) ajanga Deobarnü ashiba agi, vote agütsütsü tenüng zülüoka alir shilem 60 jungnüai anepdang 11:00 ako tashinung vote agütsür liasü.

Vote menenba nungi nüburtim nokdangtsü asoshi tawa yangluba ozüng kübok nisung ana apu.

Pua alirtem rongnung nisung kati pa indang ballot paper nung "X" yanglur social media nung prokshi aser kati ballot ya pa indang pocket nung inoka ayu aser polling station temai adoker indok, ta NEC odongtar Som Morida-i ashi.

Metemsüba inyakim nung takok angur takzütetsü imla atar, ta International Federation for Human Rights (FIDH) ajanga election agitsü lia ashi.

Iba election ya 2018 election indang tanüdagtsü ka amai lir aser iba küm kanga nungtugu aliba Cambodia National Rescue Party (CNRP) ya yimtenren nungi nokdanga Hun Sen-i parliament nung menden

ajak nung takok angu, ta FIDH ajanga ashi.

Arishi küm 37 tain taxi driver kati ashiba agi, tang nokdanga aliba opposition party aser yangji lenirtem pai meimer, saka vote magütsüra sorkari merenshitsü tsüboa bilem, kechiaser nüburtim vote agütsüba ketdangtsür temi meteter.

"Onoki tensa meteta lir. Onoki ochiji meteta lir. Saka onoki mejembiteter," ta pai ashi.

Hun Sen'er jabaso Hun Manet ya West Point nung aliba United States Military Academy nungi graduate asü aser United Kingdom nung aliba university ka nungi PhD ngua lir aser pa kanga kera Cambodia military nung temaleni atu aser 2018 küm army indang commander akum.

Pa ya national assembly nung züngsem akumtsü atema election nung tang mezüngbuba tokteper.

Tebui jabaso nem tashi amoktsüba ajanga Cambodia nung temelenshi arutsü ama aikati amanger saka pai tashi ajakbo magütsütsü ta kari tamang makateter.

# Satwiksairaj aser Chiirag nati Korea Open kokogo



**Chiteni/July 23, 2023 (Agencies):** India nunger tebur tarep asayar Satwiksairaj Rankireddy aser Chiirag Shetty nati Deobarnü Korea Open 2023 badminton asayamung final nung Indonesia nunger top seed tarep Fajar Alfian aser Muhammad Rian Ardianto na kokogo.

Satwiksairaj aser Chiirag nati iba asaya 17-21, 21-13, 21-14 agi koka BWF World Tour Super 500 title asembuba kokogo. Final asaya ghonda ka dak tema asaya liasü.

Satwik aser Chiirag na külemi asaya tenzükba sülen tenati asayamung aika kokogo,

kong Games nung gold, Thomas Cup nung gold, World Championships nung bronze medal anguba aser Super 300 (Syed Modi aser Swiss Open), Super 500 (Thailand aser India Open), Super 750 (French Open) aser Indonesia Open Super 1000 akokba densema lir.

India nunger tarep yagi iba asayamung semifinal nung China nunger tarep Liang Wie Keng aser Wang Chang 21-15, 24-22 na koka liasü. Liang Weikeng aser Wang Chang nati taküm küm tetenzüklen All England Open aser Malaysia Open nung India nunger tarep

ya koker liasü. Kasa mapang nung Satwiksairaj aser Chirag nati Japan nunger tarep Takuro Hoki aser Yugo Kobayashi na straight game nung koka semifinal-i ia liasü. Satwiksairaj aser Chiirag nati iba asaya 21-14 21-17 koka liasü.

Tenatisa Takuro Hoki aser Yugo Kobayashi na 21-14, 21-17 agi aser Wei Keng Liang aser Chang Wang na 21-15, 24-22 agi mezüngbuba aser tanabuba round nung koka liasü.

PV Sindhu, HS Prannoy, Kidambi Srikanth nunger amala India nunger asayartem iba asayamung nung kanga kara tsükatokba sülen final stage nungbo India nunger rongnungi Satwik aser Chiirag na dang anunga liasü.

Tenati iba asayamung makok tsüngda taküm Swiss Open, Asian Championships aser Indonesia Open koker liasü.

Tena tang agi tasembenbuba BWF Super 500 tournament ka nung asayaogo. Tenati taoba mapang 2019 Thailand Open aser 2022 India Open koker lir.

Temetetsükaji Paris 2024 Olympics atema qualify asütsü asoshi Korea Open nung asayaba ya-a züngoksemsü. Badminton atema qualification window taküm May 1 nü tenzükogo.

# ISSF World Junior Championship: India tebur trap team-i silver angu

**Chiteni/July 23, 2023 (Agencies):** Changwon, Korea nung tang asaya aliba ISSF World Junior Championship nung India tebur trap team-i silver medal nguogo.

India tebur trap team nung Bakhtyaruddin Malek, Shardul Vihaan aser Arya Vansh Tyagi nunger densema lir.

Parnoki aseme silver medal ka anguba densema India nunger asayartemi iba asayamung nung medal 15 nguogo.

Final asaya nung parnok asem senteper point 346 ngua liasü. Iba asaya ya Italy team-i koka liasü. Parnoki ajak senteper point 356 ngua liasü.

Taoba mapang India nunger tebur trap shooter tem kati

danga final tonga masayateti liasü.


Tetsür trap asaya nung Ashima Ahlawat top six-i ia liasü saka final nunga kasa jenjang nung dang tembanga liasü. Qualification nung Ashima-i point 109 angu aser final spots asem rongnung ka nguteta liasü.

Shoot-off nung Ashima indang teammate Preeti Rajak mezüngbuba tsüka liasü.

Preeti, Bhavya aser Aadya Tripathi nungeri team asaya nunga point 312 dang angu aser bronze medal monguteti liasü. Iba asaya nung China team-i point 314 ngua bronze medal angu.

Tetsür team asaya nung USA aser Italy nati gold aser silver medal ngua liasü.

# Sumit Nagal-i Tampere Open kokogo



**Chiteni/July 23, 2023 (Agencies):** India nunger tennis asayar Sumit Nagal-i Deobarnü Tampere Open final nung Czech Republic nunger asayar Dalibor Svrčina 6-4 7-5 agi koka title benogo.

Iba asayamung akokba densema Nagal-i ATP Challenger title pezübuba kokogo aser taküm asayamung tanabuba koktetogo. Arishi küm 25 tain asayar yagi taküm April ita Rome nung Garden Open koka liasü.

Asaya mezüngbuba set Nagal-i junga metenzükter aser pai pa indang mezüngbuba serve game makok aser Svrčina 3-0 agi tejakdang aküm aser maneni 4-1 agi pa timba liasü.

Ajisüaka Nagal-i asendenshir kanga junga asaya aser pa indang serve break mesüdaktsüba den Svrčina indang serve anaben tashi break süa mezüngbuba set 6-4 agi koka liasü.

Mezüngbuba set tatemlen junga asayaba sülen Nagal-i tanabuba set kanga junga asaya tenzük aser Svrčina indang serve ka break süa 4-1 agi tejakdang aküm. Ajisüaka Czech nunger asayar yagi meyiper Nagal indang serve break asü. Iba serve break asüba ajanga Nagal nem timtem magütsü aser pai meyiper Svrčina indang serve break süa pa 5-3 agi tejakdang aküm.

Ajisüa asaya memerengdangi toktsütsü asoshi Svrçine tebilemba maliasü aser pai kanga meranga asaya Nagal indang serve break asü aser decider asayatsü atema timla agüja liasü.

Game 5-5 koker aliba mapang Nagal-i ano Svrçine indang serve ka break süa pa 6-5 agi tejakdang aküm aser asaya akoktsü atema serve süa asaya koka liasü. Tena tsüngda ghonda ka ser minute 44 asaya liasü.

# NorthEast United FC-i Soraisham Dinesh Singh alizükogo



**Chiteni/July 23, 2023 (Agencies):** Indian Super League (ISL) club NorthEast United FC-i Honibarnü sangdong ka ajanga defender Soraisham Dinesh Singh den küm ana atema tenangzüktepba yangluba sangdongogo.

2023-24 football season atema team akangshitsü asoshi inyaktepba mapang Manipur nung soa ainba asayar ya club-i alizükba tesüsabuba asayar kümogo.

Shillong Lajong aser Royal Wahingdoh nung mapang

tatsüka asayaba sülen Dinesh ya 2016 küm nungi Real Kashmir nung asaya tenzük. Küm ka lir pa TRAU FC nungi asayatsü atema Manipur-i meyipa aru, kong pa season asem tashi asaya aser iba mapang par club I-League-i promote süa liasü.

Iba sülen 2021-22 season metenzük tsüngda pa Sreenidi Deccan-i ao aser season ana tashi kanga junga asayaogo. Tang pa teti Soraisham Sandeep Singh tsüngsü nung anidaka Indian Super League

club ka nung densemogo.

"NorthEast United FC ya ni atema mezüngbuba ISL team asütsü. Manipur nung asayar ka ama iba club tenüng nungi asayatsü maongka anguba ya nükjidong atalokba ka lir. Iba club nungi anitetba asayartem aika anitetba ngua ni iba club nung adentsü telemtetba agia liasü," ta Dinesh-i ashi.

Head coach Juan Pedro Benali-i, Dinesh amala asayar ka anisemba indang inyakyim lemsatepa liasü.

"Tetsüng anapronglai kasa asayatetbaji football nung kanga senti sempet ka lir. Iba den bendenloksema backline ajunga nung asayatetba asayar ishika dang lir. Dinesh dak sempet tajung keta lir. Pai asaya nung tajangshiba aika bena lir aser jenjang tasen ka agitsü atema renema lir," ta Benali-i ashi.

Tang transfer window nung Konsam Phalguni Singh, Ibson Melo, Redeem Tlang, Buanthanglun Samte, aser Michel Zabaco sülen Dinesh Singh ya NorthEast United FC puri alizüba asaya trokbuba kümogo.

**BILEMDANGANG**  
"Mebilemdangi angazükbaji nungdaka mali, ajisüaka mangazüki bilemdangbaji lendong lir."